

Kipindji : 11. KUTUMIKISHA KWA BYA BUNTU BYA KIKUDI-E-SELELE

Atwikalanga bamone'shi bya buntu (bipeedi) bipebwe mwanda wa ku kwasha na ku kukankamika ka Kakongye. Kya buntu kipebwe kwi Kikudi-E-Selele, na baaba be mu kakongye balombeene kushinguula kya buntu kitule Fumu munkatshi mwabo. Bino abileshe bu kilesheso, pa saa ya tulongo eyi dy'Efile-Mukulu, yawa alongyesha suunga alambukisha ekale na binangu bilombane mwanda wa kupushisha kwi buwa kwa bifundwe. Mukwetu mwipaane mu kulambukisha abitungu ku mukanya mu kakongye.

Bifundwe abitutentekyesha'shi mufubi eyendo yawa mutambule kya buntu kya Kikudi-E-Selele abitungu'shi alame **bitungo byoso bya Fumu Yesu Kilisto**. (1Bena Kolente 12 :3). Bilombeene kwikala anka byabya, mwanda'shi bya buntu bipeembwe kwi Kikudi-E-Selele na kingi kina mwanda kya Kikudi-E-Selele kileshiimbwe patooka kwi Fumu mu mukanda wa Yoano 15 :26 : « Anka pakafiki Musambi, yawa akatukila kwi Yaya ankenutumina'mi, Kikudi ki'Eyendo akatukila kwi Yaya, yawa akalesha bukamoni kumwanda wande » (Yesu). Na dingini mu Yoano 16:14 « Aye wini akantumbisha, mwanda akaata kyoso kii kwandji na akenulungula kyanka ». Oolo, atutengyela bwa'shi Efile-Mukulu Kikudi-E-Selele ekale mukumbaswe n'Efile-Mukulu Mwana.

Pe mufubi musasakate, twibakumbeene kutaluula kya buntu ki mupeebwe kwi Kikudi-E-Selele na kwikala mulamate kwi Fumu Yesu.

Twibalombeene kwipaana mu luteko bwa kwata bushito bwa kyakya kya buntu kya mukwetu na ku mu kankamika. Ungi mwanda, mbitala bushito bwa mufubi. Pa'ye kutambula kya buntu, mufubi mukumbeene kwi kitumikisha na kepatshilo kabadi bamupeelee kyanka, mwanda wa **kukankamika** kakongye.

Atubadika dingi mushindo ubaadi awukitshi mutumibwe Mpolo. Pabaadi'ye ende ku Mile, bayitanyine bakulu baku Efeso na bebalwingwile : Pabile mufubo waye munkatshi mwabo : « *Na pababafikile kwadi, beba lungungwile'shi anuwuku kipaso kyandji mushaale munkatshi mwenu saa yoso kubangila ku efuku dya kwibedi dinatwelele mu Asi, mu kufubilanga Fumu na kwiyisha kooso na Mpolo, na bitompwanga bibanfikilanga ku mitewo ya bena Yuda* » Mikitshino 20 : 18-19. Mufubi ena kitungo kya kulama muginangu mwikeelo waye wa bu mufubi kumpala kwa Fumu na mukatshi mwa bakwabo.

Tubafiki binobino pa lukonko : Kumpala kwa muntu kini Mufubi ena bushito? mu bintu bipeela bya mu muwa wa mwina kukumiina, mutumibwe Mpolo afundu bino'shi : « Obe we'ni akutshibila mufubi a bene kiimu ? » mulombeene kwimana suunga kupona wawa ni mwanda utale fumwaaye, na akayimikwa bwimane » Looma 14 :4. Mu bipaso byoso, atwe boso twi bafubi ba Fumu na twina bushito kumpala kwa'ye mu kipaso kyatudi bekale. Muyile kya buntu kya bupenka, bushito bukile kuneema na kwi kingi kipaso kya kwata.

Yawa mukankamikibwe na Fumu bwa kukita mufubo ukampanda mukakongye ende kumpala nakwiyisha, kushii aye kukimba mbalo ya kineemo na matalwa. Mufubi tekumatalwa suunga ku bukunkushi bwa bakwabo, Anka akimbi kutumika mukwipeteena kwi buwa n'abo. Bushito bwa kumpala bwa'ye bwi penda kwi Fumu. Abimweneka'shi bangi namu mu kakongie, abeele meeshi'shi bukome bwa'ye abumwikasha na bukalabwino

bwa kukita ingi mifubo, anka tabe na matalwa a kumukunkusha anka penda ku mupa malango.

Anka mu kyakya kipaso kimune, kwi bakunkushi mu kakongye : « *Kookyelaayi bakunkushi benu, na yikalaayi beyishe, mwanda bakwete kukutwa tulo pa mwanda wa bikudi byenu, nka bu bantu bena ebasu, byabadya kwibikita na muloo, anka kushii na meyalasheeno, mwanda byabya tabikeekala na bukwashi kwanudi nya* ». Bena Ebeleo 13 :17. Twi mu mafuku atumono bangi abapwandjikisha'shi bena matalwa a akukunkusha Mufubi a Fumu ku mudimo ukampanda.

Su atukumiina kwikala mu'Eyendo dya Fumu na mu Eyi dyaye, twibalombeene penda kutuusha malango kwi baaba abeakimbi suunga bakutwe bukalambwino. Fumu nabeene n'aye akunkusha bafubi baye.

Atumono'shi kya buntu kya bu mupalakashi a mukandu wibuwa, kiina bwakyo bukunkushi bwilekeene na bingi bya buntu. Bya buntu bibungi abitala anka ku mufubo na ku kankamika mu kakongye. Mupalakashi a mukandu wibuwa eena lwitanyino lukata, paasha pa kakongye, mwi baaba bena lukalo na kipandjilo. Aye, ebu kina mbidi kya kakongye, anka ende kwi baaba be paasha pa kakongye na kepatshilo kaashi belangye. Atumono mu mukanda wa Mikitshino 2:6 « *Na pabapalakene ewunga dya uno mwanda Kibumbu kibembungile* » na kibafutakeswe mwanda'shi muntu oso bekapushanga abaakula mwidimi dyaabo, na booso bwabo kibebatupikile, mu kishingatshilo 14 « *Anka Mpyele, pabebwele n'ekumi na umune* » beelele musaase, na kwibalungula'shi : bena Yuda n'anwe booso bashaleele mu Yelushaleme, ukaayi bino na teeyi matwi ku mayi ande » na bebalungwile mukandu wibuwa. Lwitanyino lwaye lubaadi : « *lwakwilanga* », Kishingatshilo 38 na bantu peepi na binunu bisatu baabakuminyine Fumu Yesu bu mupashi abo. Atusangana malango apeela muyile ntumikilo ya mupalakashi a mukandu wibuwa. Bu kamoni bwaye bwi kumufubo wa Fumwetu Yesu wu ba kumbeshe ku nkuluse, naashi ank'aye bupenka mulombeene ku mupasha ku milwisho. Bino abileshe'shi: mushindo wa kutumika wukumbeene kushintuluka mu bipungilo bilekeene, na ena bulungatu bwa kushituula ntumikilo mukipaso akitumbisha Fumu, na akikela na kepatshilo kwi baaba abakimbi kupeta. Paapa p'eyi dy'Efile-Mukulu ntadyakule, mufubi ena bulungatu bwakukita mukipaso kyoso kya kupeta bikudi bishimine.

Palukiila ku Kakongye, lukalo lwa mupalakashi a mukandu wi buwa lwa kufwisha baaba babelanga mu Kakongye. Eyendo mu byabya nyi amukitshika bushito kwi Fumu bwa yawa alongyesha.

Su Efile-Mukulu musangule mufubi pa mwanda wa mufubo ukampanda yawa mufubi ende kumpala bwa kulombasha wawa mufubo. Afube na kukulupila mwi Fumu. Bino bi kwikala bu mufubo ushii wa saa yoso, mwanda ingi saa, bu bii bafubi boso ba Fumu, mu nshelelo aye a mafuku ooso ena angi mashito akwata a kifuko kwaye. Byabya bya kitshi ku mufubo wa Fumu ebikitshi kushi kutengyela efuto dikampanda. Fumu batumine beyi baaye na uno mukamiko: « *Nubapete bisumanga, nupaane bisumanga* » Mateo 10:8. Mafuku aakafiki na Fumu akafumankana na booso bena kukumiina « *Mwanda abitungu'shi booso bwetu tukemane kumpala kwa kisambilo kya Kilisto, bya'shi muntu oso atambule bintu [bibakitshine] ku mbidi, muyile bibakitshine, suunga bii buwa suunga bii bubi* » 2 Bena Kolente 5:10. Mutumibwe afundjila Timote na kumulungula'shi : « *Napu kulwa ngoshi*

ibuwa, napu kusuuka lubilo, nalama lukumiino ; kubanga binobino mbambikile kilongo kya kululama, fumu sushi mululame akekimpa mu dyadya efuku, kushii penda kwandji, anka namu kwi baaba booso abakumiina kumweneka kwaye » 2 Timoté 4:7-8.

Lwitanyino ku mufubo wa bupenka.

Na binobino atushinkamisha'shi bya buntu [Bipeedi] bya Kikudi-E-Selele abitumikishwa bwa mufubo wa saa ikampanda bwa Fumu. Kwi bangi bafubi, na balume suunga bakashi, bayitanyinwe na Fumu ku mufubo waye saa yoso. Mutumibwe Mpolo namu baadi aku bano bafubi. Bangi namu babaadi bepaane saa yoso ku mufubo wa Fumu *bu* : Balanabase, Silase, Maako, Luuka, Timote na Tite tubatemuna penda bano palapala. Lwitanyino bwa mufubo wa saa yoso, ta wukatusha mufubi ku matalwa suunga bushito bwaye ku kifuko kyaye. Mwanda abimweneka pangi'shi Mulume suunga Mukashi mukumbeene kwikala mwitanyinwe na Fumu. Ku byabya mufubo ulombeene kwatshibwa mu kifuko anka bu kumpala kw'Efle-Mukulu. Twina lukalo lwa kwalukuula ku Kilombeeno [Esambi] dipya bwa kwikala bakunkushibwe ku mboko ya Fumu.

Twina bakumbeene namu kushinkamisha'shi lwitanyino lwa Fumu ku mufumbo waye alufwisha dingi myanda, Anka bii kineemo kikata bwa kumutumikila, mwanda atwibikishi bwaye.

Su bena Kukumiina betanyinwe ku mufubo saa yoso, Fumu mulombeene kwikala nabo lukalo na kwibafwisha ku angu mawumbo ekwibula. Twina lutumbu bwa baaba babaadi bayitanyinwe ku wawa mufubo, na dingi kwi lwalwa lukalo mu nsenga ishima. Anka taatwelanga binngu'shi lwitanyino ku mufubo saa yoso abipatuula'shi lwitanyino lwa kwenda mu angu mawumbo nya. Fumu ayitanyina bangi bwakumufubila saa yoso «*Ku shibo*», suunga ekala mu ewumbo kini na bina kineemo kikata. Kina mwanda anka'shi Fumu nabeene mukwitanyine na mukusangule bu mufubi na Kepatshilo ka kwibaka Kakonye kaaye.

Bishingatshilo abilondo abileshe lwitanyino lwa bafubi kwi Fumu: «*Byabya ku kakongye kabaadi ku Antiyoshe, kubaadi batemuki na balambukishi: Na Balanabase na Simone, ayitanyinibwa bu Fiita, na Lukiwuse a ku Silene na Manaena, bakushiiswe na Elode, Fumu a kipindji kikata kya senga, na Sawule. Bu bibabadi abafubila Fumu na kwishidika, Kikudi-E-Selele bambile'shi: binobino ntudileeyi Balanabase na Sawule, ku lupese, mwanda wa mufubo unanebetanyinine. Byabya pababapwile kuishidika na kuteka, na pababebatentekyele maasa babebalekyele benda » Mikitshino 13:1-3.*

Bino bishingatshilo abileshe kwilondeena kwa bipindji bitale lwitanyino:

Balanabase na Mpolo boso babidi babaadi bashinkamishe'shi lwitanyino lwabo, alufikila kwi Kikudi-E-Selele bwa mufubo wi pa bwawo, ushii baadi bya kwela mpaka, suunga kupela. « *Unanebetanyinine* » Mikitshino 13:2. Pangi bikufikashi Mufubi tamupushe lwitanyino lwaye kalolo. Anka kunyima kwa mafuku, mufubi akekala na kishinkamisho kya lwitanyino lwa Fumu.

Babaadi na bantu bena bukalabwino mu kakongye, Batemuki na balambukishi, anka byabya babaadi abesamba myanda pamune. Malango abo abaadi na muulo ukata, nabo namu

babaadi bashinkamishe lwitanyino lwa Balanabase na Mpolo na kwi bakankamika byabadya kwenda kumpala. Bibuwa namu'shi bakwetu be pamune mukakongye bekale na kishinkamisho ki buwa kya yawa adidi kutumika mufubo wa saa yoso na ekale mukulupilwe kwi bakwabo mu kakongye. Byabya abitukankamika, na buwumune nyi mwabi ukata na awufikaa ku nteko na mu kwipeteena. Su kwekala mpaka mu mashimba pa bitale kinangu kya mifubo, kwi mandamuna ebungi mu kwipaana koso mu luteko na Fumu akatuulu Eyasa dyaye mu myanda yoso. Timote bakatukile ku Lusutule na Mpolo na atumono « *yawa baadi na bukamoni bwi buwa kwi bakwetu babaadi ku lusutule na ikonyunu* » Mikitshino 16:2. Bukamoni bwi buwa bwa bakwetu ku lupese lwa Timote bubaadi abulesha kukumiina kwabo bwa'shi Timote ende na Mpolo (Mikitshino 16:1-3).

Tabibaadi anka penda yaya saa, mwanda wa kwibunga kwa bebungi suunga kutwela « *lukuku lwa bakwetu* ». Baaba bakwetu babaadi na bukalabwino na bapwidikye na mweneno ebuwa mu bukunkushi bwa Fumu, na babaadi batuulwe bwa kutusha malango ebuwa. Kushi kwiyalashena, kakongye kabaadi kalungulwe na kusemuna bushito bwa baaba babaadi bende mu lwendo mu luteko (Talayi Kina mwanda mu kipindji kya 5 kii kushi). Atwele meeshi'shi kino kikitshino ki buwa kwi mufubi mwitanyinwe kwi Fumu, ekale mutumibwe kwi Kakongye kaye. Kuno kutumwa suunga mukanda wa bukamoni ulombeene nkupebwa anka su lwitanyino lushinkamiswe kwi kakongye. Uno mukanda wa bukamoni awulesha dingi kwi mufubi, bukome na buwumune bwa kwenda kumpala.

Kakongye kabaadi akadidi kulesha buwumune bwako bu bibaadi Balanabase na Mpolo bepaane na kwi batenteka masa. Kikitshino kya kulesha buwumune bwabo kilombeene kushintuluka muyile mawumbo. Buwumune bwa Kakongye kepabwako na tungi tukongye bwina muulo ukata. Baleshi mpala [les Représentants] ba kakongye balombeene kukimba kulama kwipeteena na baaba abatambukila mukandu wi buwa na kulungula kakongye na bangi bakwetu pa bitale lwendo lwabo.

Mu mukanda wa Mikitshino 14:26-27, Mpolo na Balanabase babaalukiile ku Antiyoshe « *Na kwakwa babayiile dya meema akata ku Antiyoshe, kwini kubabadi balubulwe ku buntu bwa Efile-Mukulu mwanda wa mufubo ubabakitshine. Na pababafikile bababungile kakongye, babebalondeele bintu byoso bibakitshine Efile-Mukulu kwabadi na bini bibaadi mubawile bena mawumbo kibelo kya lukumiino* ». Nakyo kina mwanda kya fundiilo mu kino kipindji. Dingi, bina kineemo kikata bwa'shi buwumune bwikale munkatshi mwa baaba bayitanyinwe mu nyendo na baaba bashaale mu kakongye. Kino kilesheso kya lwaluulo ku lwitanyino lwina mpatulwilo mukata na kineemo kikile bukata bwa ntambukilo a mufubi na mudimo waye.

Takwi mwanda wa bungi bwa pipwa suunga kapatupatu kakampanda kafundwe bwa kwaluula (kukumiina) lwitanyino nya. Fumu ayitanyina misuuwa ibungi basongwalume bena bukome na katshintshi kumufubo waye saa yoso, anka tabikitshikanka byabya nya. Ayitanyina baaba bapwidikye ku mufubo waye.

Abimweneka patooka'shi bafubi ba Fumu, abafubu saa yoso, paapa takwi bu kakomoni bwa kakongye mwanda tabende bupenka nya. Bukwashi bukata bwa kwenda na bangi bakwetu bena kyuwukilo. Lwitanyino lwa Balanabase na Mpolo alulesha'shi baabadi abende boso bubidi na bifundwe tabileshe'shi mutumibwe Mpolo baadi ende bupenka nya. Twibafunde

dingi'shi Timote baadi mwende na Mpolo. Su Fumu atumu beeyi baye ku mufubo wa mafuku apeela, ebatumu « ***babidi-babidi*** » Maako 6:7. Kikitshino kibwa kulonda.

Anka bu bya twikalanga bamone, Kakongye nanko mbangilo bwa ku kankamika mufubi bwa kulonda lwitanyino lwa Fumu.

Atushinkamisha kalolo'shi tukongye tukumbeene kukankamika mufubi mupya bwa'shi afubile Fumu, kumpala mu yaya mbalo ipwe kutumikidibwa kwi kakongye. Kwi lukalo lukata lwa bafubi bepaane saa yoso ku mufubo wa Fumu, na twibalombeene kuteka kwi Fumu bwashi ayitanyine bafubi bwa wawa mufubo.

Mufubo wa bupenka

Lwitanyino lwa Fumu kwi mufubi lwa kwenda kumpala (Ku meeso) « *mwanda wa mufubo unanebetanyinine* » Mikitshino 13:2. Uno mufubo ulombeene kwikala namweneno mwilekeene. Mufubi, mukunkuswe na Fumu, mulombeene kwenda mbalo ikampanda bwa kubanga mufubo. Yawa mufubi mulombeene kubanga mudimo na ungi muntu atabaadi mutumikye naye, suunga na bangi bantu bakapushisha na kulesha lukalo lwa kutumikila Fumu yaya mbalo. Sunga'shi byabya abipatuula kwenda mu anga ma mbalo ashi ende Kakongye. Bino bina bukwashi. Bikile buwa kukankamika kino kipaso kya kupalakasha mukandu wibuwa su abikitshika na kepatshilo ka kufwisha bantu kwi Fumu na kutamisha kakongye. Fumu naye akunkusha na kukitshisha wawa mufubo.

Tshite-mwakwidi a bena yunda, baadi mwikutwene na Fumu, bakwatshile batumibwe (Mikitshino 5) mwanda baabadi abakula patooka bwa kufuisha (bantu) kwi Fumu.

Baabadi bedibwe mulukano munda abufuku bushima, anka Fumu baadi mwibatushe. Pabafikile bafubi ba kutumilaadi bwa kwenda nabo ku tumilaadi bwa kwibasambisha, bu kumpala kw'Epata dya ba sushi: babebatundwile na kwakula « *nukalungule bantu mayi oso a uno muwa* » Mikitshino 5:20. Dimoni, babekeele bena lukano na kwi basashila. Ganaliyele, Mufadishi, umune a kubalambukishi mukata a mwiya, balungwile ben'aye'shi « *Bena Isalele Dimukayi anwe banabeene ku bano bantusu ...uno mufubo....Anka su awufiki kw'Efile-Mukulu, tanwibalombeene kwibapalakasha kutshiina'shi tala nwekala bapetshibwe abalu n'Efile-Mukulu* » Mikitshino 5:35-39.

Kwi mwabi pa tukankamika bwa kutungunuka ku mufubo wa Fumu na kutusha bukwashi ku mufubo patudi na bukome bwa kwibikita. Su Kakongye ka kankamikwe ku wawa mufubo, kwi mwabi. Mpolo nabeene baadi mu mwanda wi bukopo pabaadi mwedibwe mu lukano ku Looma. Bangi namu bababaangile kulambukisha mukandu wibuwa. A kini kibaadya kukita? Bafundjile: « *n'ashi bakwetu bebungi ku nkano yande mbakulupile mwi Fumu, bena kishima kiibungi bwa kulungula eyi kushii moo. Eyendo, bangi abalungula wa Kilisto pa mwanda wa malaka na kikudi kya kwipikena, anka bangi namu n'eshimba diibuwa; pa kifulo, bano abawuku'shi nemutudiibwe pa mwanda wa kulamwina mukandu wibuwa, bangi abalungula wa Kilisto na kikudi kya tusakatusaka, kushii mu selelee, abamono'shi abakambushiisha mpombo bwa nkano yande. Bukini byabya? Byabya, mu kipaso kyoso, suunga mu bulamalama, suunga mu eyendo, Kilisto alungulwa na mu byabya nena muloo, na dingi na kasepeela* ». Bena Fidipi 1:14-18. Tutantaleeyi na kisukusuku kya kumona mufubo wa Fumu awende kumpala, tukwasheeyi uno mufubo mu bipaso byoso, na tusangaleeyi'shi mbidi

imune imwenekye mu Kakongye kepa bwako. Kekale kakankamikiimbwe. Byabya, mbiikile buwa kukita bwa'shi mufubo wa Fumu wende Kumpala. Su uno mufubo tambwa ntumbo ya Fumu, Tawukende kumpala nya.

Kino kipindji kya kano kakanda: 11. Kyaluulwe mu Kisongye mu Kabinda, mweshi wa mwanda mu kipwa kya 2025 kwi bakwetu bano : **Arthur NYINDU ASSANI**, na **Esther KIMANKINDA YANGONGO**.